

Dins l'autobus'

Londi, noûv eûres èt d'méye. Lalîye a s' brès câssé. Èle ni sét mwinnner s'-t-auto. Èlle a pris l'autobus'. Il î fait bin paujêre. Deûs djins. Nin d' pus. Li voyadje po Nameur comince sins mau sins rûje. L'autobus' taudje pad'avant l'èglîje. On trayin, tot d'on côp ! One vintin.ne di gamins èt d' bauchèles – cinq ans, tot-au d' pus – moussenut. Deûs dames di scoles avou zèls.

Lalîye si mèt one miète su crèsse, po fé dè l' place. C'è-st-on bia blond p'tit crolé qui s' vint achîr addé lèye. On djinti. Èle li veut bin tot d' swîte. I n' freut nin d'dja d' mau à one moche. One miète couyon ossi quétefîye. Il èst là mètu dissu one fèsse èt n' wasu r'waîtî tot-autoû d' li. Il a aspouyî si p'tit minton su l' banquette di d'avant. Aye dins lès catouûs ! Lalîye tron.ne por li. S'i vêreut jamais à rider ... Èle lî dit d' fé atincion come si ci p'tit là sèreut da lèye. Lalîye d'abôrd swèssante ans èt qui n'a jamais pont yeû d'èfant. Èt portant ...

Su l' rindjîye di d'avant, on démoné gamin. Dès nwârs-ouys come dès gayètes èt one babèye ... I n' si taît nin one minute èt criyî come on pièrdu. Tot l' monde aurè mau s' tièsse divant d'ariver à Nameur.

Nin lon èri, on-ôte gamin. On vraî galafe ! Il a mougû, one diméye eûre au long. Dès gayes, do chôcolat, dès nic-nac.

Lès dames di scole s'ont mwaîji èt lès pûni tos lès deûs.

Padrî, one bauchèle èt deûs gamins. Vèyan.mint qu'i fait frèd à l'uch, il ont tortos on bon anorak, dès mofes èt on bonèt. Li pus grand dès deûs gamins èst fwârt bin mètu. I r'chone tot on skiyeû. L'ôte, li, c'è-st-ôte chôse. On lî veut s' pania, sès lacètes ni sont nin faites èt s' calote à r'clapes lî vint kèkyî sès-ouys. I s'aurè au pus sûr moussî à l' vole ! Li bauchèle a one rôse bonète tote dilavéye. Pôve pitite croufieûse bauchèle, èlle a s' nez qui court avou dès tchandèles èt n' nin d'dja on mokwè d' potche. Lalîye satche li sink foû di spotche èt lî d'ner. C'èst qu'èlle a l'ouy à tot nosse Lalîye.

Su l' dérène rindjîye, one bauchèle èt on gamin. Li, on l' lome Tûr – on vî nom riv'nu à l' môde au djoû d'audjoûrdu. On rond visadje. One miète craus. Tûr, il èst tot seû d'èfant. Addé li, c'èst Julîye. One blanke pia maïs dès bias bleuws-ouys èt on si bia sorîre. I s'ètindenut come cu èt t'chîje. L'autobus' taudje pad'avant l'ospitau. « C'èst la clinique de ma maman » di-st-i l' Tûr. « Èlle èst bèle, in, la clinique de ma maman ». Julîye a s' tièsse ôte paut... èt si Tûr sèreut on djoû s' galant...

Dîj eûres, l'autobus' arive à Nameur. Lalîye ni v' saureut dîre si cès-èfants là alin.n' au cinéma, fé one porminâde ou on voyadje au trin. Èle tûze... Si-t-èfant da lèye, likék sèreut ç' ?

A.M. François